

## Mahasiswa UMP dan MBM Bersama Komuniti Kota Pariaman



Kota Pariaman, Sumatera Barat, 17 September - Pengembaraan Asean di bumi Sumatera Barat, Indonesia membabitkan sembilan orang mahasiswa dari Universiti Malaysia Pahang (UMP) bersama pihak Majlis Belia Malaysia berjaya mendekati masyarakat Kota Pariaman yang pernah menjadi mangsa gempa bumi yang melanda kawasan itu pada tahun 2009.

Program turut dihadiri Pegawai Psikologi Jabatan Hal Ehwal Pelajar & Alumni (JHEPA), Fara Hazlini Mohd Som, merangkap penasihat program Kembara Asean ke Indonesia dan Ketua Penerangan Majlis Belia Malaysia, Rizan Hassan.

Pengarah program, Daniel Wu dari Fakulti Kejuruteraan Elektrik dan Elektronik (FKEE) berkata, pengembaraan ini memberi mereka peluang bertemu dengan pelajar Sekolah Menengah Kejuruan Global Pariaman dan menyampaikan bantuan kepada pihak sekolah menerusi pembinaan perpustakaan mini di sana.



"Kami difahamkan sekolah ini dibuka semula pada tahun ini dengan menempatkan seramai 24 orang pelajar yang sedang mengikuti kelas kemahiran khususnya dalam bidang pelancongan. Kedatangan kami disambut meriah dan berjaya menyampaikan sumbangan seperti kemudahan almari buku, meja, kerusi, karpet, jam serta bahan bacaan untuk kegunaan pelajar di sini," katanya.

Kepala Sekolah SMK Global Pariaman, Bapak Eka Putra berkata, bantuan dan usaha yang telah dilakukan ini akan diteruskan lagi dengan menambah keperluan bagi menyediakan kelengkapan yang lebih baik untuk menampung kemasukan pelajar yang akan bertambah dari masa ke semasa. Pihaknya berterima kasih kepada UMP di atas sumbangan dan bantuan yang dapat membantu dalam proses pemulihan sekolah.

Peserta turut berkesempatan berkunjung ke rumah anak yatim Panti Asuhan Aisyiyah. Lebih menyeronokkan mereka berpeluang menaiki keretapi ke Padang bersama 20 orang anak-anak yatim untuk menikmati juadah makan tengah hari di sana. Turut diadakan program dalam kumpulan yang menyentuh tentang emosi, rohani dan fizikal melalui modul yang dijalankan.



Mahasiswa UMP juga berpeluang merealisasikan program "Go Green" di tapak Orang Pariaman Kreatif (OPC) di Pulau Angso Duo dengan membina monumen dan replika yang dibuat berasaskan dahan pokok, batu karang dan bahan kitar semula. Usaha kreatif ini menarik minat para pengunjung mencintai alam dengan cara yang lebih menarik. Sebagai simbolik kepada aktiviti ini, Mahasiswa UMP berpeluang melepaskan anak penyu di samping melakukan aktiviti pemuliharaan batu karang di sekitar pulau.

**Berita dan gambar disediakan oleh Nurul Akma Binti Mohamad Rani, pelajar Fakulti Sains dan Teknologi Industri dan suntingan oleh Bahagian Komunikasi Korporat PNC.**

Posted By : NOR FADZILLAH BINTI ZULKIPLI Date Posted : 30-09-2015, 12:25:54